

Entuzijazam s kojim se nakon ulaska indijsko-britanske kompanije Ispat-Group užurbano pripremala proizvodnja u Koksno-hemijskom kombinatu Lukavac "ohladila" su pristigla dugovanja Kombinata nastala prije nekoliko godina pod krajnje sumnjivim okolnostima



KHK Lukavac mora platiti sedam miliona KM Teminu Dediću i Vlastimiru Saviću!!!

Novi vlasnici Koksnoh kombinata šokirani dugovanjima pristiglim na naplatu • Nakon preuzimanja kompanije od Temina Dedića, Vlastimir Savić tužio Koksni kombinat Lukavac • Nakon duga od 6 miliona KM, na naplatu pristigle i zatezne kamate

Piše
Mehmed Pargan

Kada je krajem prošle godine indijsko-britanska kompanija *Ispat Group* nakon višemjesečnih pregovora konačno odlučila preuzeti Koksno-hemijski kombinat (KHK) u Lukavcu i pokrenuti proizvodnju koksa, u Lukavcu su svi vjerovali kako će se ovaj kombinat konačno iščupati iz ralja sumnjivih biznismena, koji su ga proteklih godina nemilice čerupali i obezvređivali. Brže nego što je iko očekivao, novi većinski vlasnik KHK za samo nekoliko sedmica uspio je obaviti remont postrojenja koja su dvanaest godina mirovala, 2.000 radnika Kombinata nakon višegodišnje "pauze" dobilo je plaće, dopremljen je potrebni repromaterijal – riječju, Kombinat je od beznadežnog gubitaka preko noći postao razvojna uzdanica cijele regije.

VLADA FRIZIRALA ZAVRŠNI RACUN

Međutim, početkom ovoga mjeseca entuzijazam novog vlasnika Kombinata poljuljan je neočekivanim dospelcem na naplatu nekoliko zaostalih dugovanja koja, kako smo doznali, nisu bila prikazana u završnom računu Kombinata, niti se dug u tom iznosu uopće spominjao prije sklapanja kupoprodajnog ugovora.

Pristigla dugovanja Kombinata nastala su prije nekoliko godina pod krajnje nejasnim i u najmanju ruku sumnjivim okolnostima. Naime, "poslovanje" KHK u godinama poslije rata uglavnom se odvijalo preko iznajmljivanja "zdravih" tvornica koje su postojale u okviru Kombinata. Tako je, između ostalih, jednu od proizvodnih cjelina u okviru Kombinata zakupilo i preduzeće *Chelita* iz Švicarske. Vlasnik *Chelita* bio je **Temin Dedić**, biznismen iz Teslića, koji je svojevrsteno s velikim uspjehom a za malo novca pokupovao nekoliko desetina preduzeća u Istočnoj Njemačkoj i zemljama Ruske Federacije. Dedić je u Koksno-hemijskom kombinatu preuzeo pogon proizvodnje maleinske kiseline. Istina, još tada se špekuliralo da je Dedić na ovaj način pokušao dokapitalizirati Tvornicu maleinske kiseline kako bi se na što jeftiniji način dokopao stvarnog cilja – cijelog Koksno-hemijskog kombinata, ali na te priče se tada niko nije osvrtao.

No, kako ni nakon dužeg vremena Dedić nije uspio (a čini se ni namjeravao!) pokrenuti proizvodnju maleinske kiseline, tadašnji menadžment je zatražio raskid ugovora. U tom trenutku dug *Chelita* prema KHK dostigao je više od 1,2 miliona maraka. S druge strane, u *Chelitu* su tvrdili da je KHK raskinuo ugovor jednostrano

kako bi se posao dodijelio konkurentskoj firmi *Kemokomplex*, čiji je vlasnik hrvatski tajkun bosanskog porijekla **Enver Moralić**. Vlasnik *Chelita* Temin Dedić povlači potpuno neočekivan potez: pokreće stečaj nad svojom kompanijom a svu imovinu ove firmu i sve njene obaveze, pa čak i ugovor sa KHK, prodaje kompaniji *Inkometal* u vlasništvu izvjesnog **Vlastimira Savića**, dugogodišnjeg poslovnog ortaka Temina Dedića.

KAMATE NA NEPOSTOJEĆI DUG

Odmah nakon preuzimanja *Chelita*, vlasnik *Inkometala* Vlastimir Savić pokreće arbitražni spor pred Međunarodnim sudom u Beču sa zahtjevom da mu se nadoknadi šteta zbog jednostrano raskinutog ugovora! Iako se u tom trenutku zahtjev ove kompanije Vlastimira Savića činio neosnovanim i krajnje nerealnim, poslje-

KO ĆE PLATITI DUG:

Prema jednoj verziji, novi vlasnik KHK Ispat Group, preuzimajući tvornicu, preuzeo je na sebe i sve njene obaveze a po drugoj verziji, dug prema Inkometalu dužna je platiti vlada Tuzlanskog kantona

dice arbitražnog spora za KHK bile su više nego tragične: Međunarodni sud u Beču presudio je u korist *Inkometala* a Koksno-hemijskom kombinatu naložio je isplatu pričinjene štete u iznosu od šest miliona KM!!!

No, tu nije kraj ove kriminogene priče! Naime, početkom ovoga mjeseca u Vladu Tuzlanskog kantona, Kantonalni sud u Tuzli i u KHK Lukavac stigao je novi zahtjev *Inkometala* prema kojem bi KHK trebao uplatiti na račun ove firme dodatnih milion maraka, navodno, na ime zateznih kamata. Tako se dug prema *Inkometalu* popeo na punih sedam miliona KM!

Kako smo doznali, novi vlasnici Koksno-hemijskog kombinata bili su šokirani sudskom presudom iz Beča. Naravno, prispjele obaveze prema *Inkometalu* još uvijek nisu izmirene i u ovom trenutku nije do kraja jasno ni ko će ih eventualno izmiriti.

Prema jednoj verziji, novi vlasnik KHK *Ispat Group*, preuzimajući tvornicu, preuzeo je na sebe i sve njene obaveze a po drugoj verziji, dug prema *Inkometalu* dužna je platiti vlada Tuzlanskog kantona, koja je sve donedavno bila većinski vlasnik kapitala u Koksno-hemijskom kombinatu.

U svakom slučaju, dug prema *Inkometalu* od sedam miliona KM ozbiljno je poremetio do tada idilične odnose između novog vlasnika KHK *Ispat Groupa* i Vlade Tuzlanskog kantona.

ZATAŠKANA AFERA S DEVIZNIM RACUNOM

Zanimljivo, nakon preuzimanja KHK *Ispat Group* je zadržao i njegovo kompletno rukovodstvo. Međutim, prvi čovjek Koksare u poratnim godinama dr. **Pašaga Muratović** iznenada je, navodno samoinicijativno, odlučio napustiti direktorsku fotelju.

Kada je sa čela KHK '97. godine naprasno u (ne)zasluženu mirovinu otišao **Zejnir Đapo**, na upražnjeno mjesto direktora KHK Vlada Tuzlanskog kantona imenovala je dr. Pašagu Muratovića. Đapo je umirovljen po hitnom postupku a neposredni povod bilo je otkriće o nestanku nekoliko miliona DM, koliko je pred početak rata Koksno-hemijski kombinat Lukavac imao na svom računu u Švicarskoj. Umjesto da blagovremeno raščisti nastalu aferu, tadašnja Vlada Tuzlanskog kantona učinila je sve da je zataška.

Prvi poslovni potez novog direktora KHK Pašage Muratovića bio je upravo ugovor s Teminom Dedićem i njegovom kompanijom *Chelita* a nešto kasnije i s Enverom Moralićem, vlasnikom kompanije *Kemokomplex* čije je sjedište u Frankfurtu. I Dedićevo i Moralićevo ime svojevrsteno se spominjalo u nerasčišćenoj aferi s deviznim računom Koksog kombinata Lukavac u Švicarskoj s kojeg je netragom nestalo više od pet miliona DM.

I novi poslovni aranžman s Dedićem, kao i onaj sklopljen s Moralićem, Koksno-hemijskom kombinatu donijeli su samo goleme dugove. Prema informacijama koje smo dobili u KHK u Lukavcu, ugovor sa *Kemokomplexom* također je podrazumijevao zakup proizvodnje maleinske kiseline, ali i plaćanje zakupa ukoliko ne bude bilo proizvodnje. S obzirom da više od tri godine nije bilo proizvodnje, prema ugovoru *Kemokomplex* je trebao platiti Koksari na ime zakupa čak četiri miliona maraka. Na tri sjednice Upravnog odbora KHK postavljeno je pitanje menadžmentu zašto nije pokrenuta tužba protiv *Kemokomplexa*, ali na ovo pitanje nikada niko nije dao odgovor. Kada su učestali zahtjevi za pokretanje spora sa *Kemokompleksom*, Pašaga Muratović je donio odluku da se svojevoljno povuče sa pozicije direktora.

No, kako smo nezvanično doznali, odluku o "dragovoljnom" povlačenju Muratović je donio teška srca, nakon nedvosmislene sugestije koju su mu uputili novi vlasnici Koksno-hemijskog kombinata. ♦